



## SAOPĆENJE ZA JAVNOST

27. decembar 2024.

# Potvrđena optužnica protiv Seada Zahirovića za krivična djela korupcije i pranja novca

Tužilaštvo Brčko distrikta BiH podiglo je optužnicu protiv Seada Zahirovića zv. "Sejo" (58)\* što je pod tačkom 1. optužnice učinio krivično djelo Primanje dara ili drugog oblika koristi za trgovinu uticajem iz člana 376. stav 1. Krivičnog zakona Brčko distrikta BiH u sticaju sa krivičnim djelom Pranje novca iz člana 265. stav 3. u vezi sa stavom 1. Krivičnog zakona Brčko distrikta BiH, dok je radnjama opisanim u tačkama 2-16 učinio produženo krivično djelo Zloupotreba položaja ili ovlaštenja iz člana 377. stav 3. u vezi sa stavom 1. i članom 55. Krivičnog zakona Brčko distrikta BiH u sticaju sa produženim krivičnim djelom Pranje novca iz člana 265. stav 3. u vezi sa stavom 1. i članom 55. Krivičnog zakona Brčko distrikta BiH.

Tužilaštvo Brčko distrikta BiH je istovremeno zatražilo da se optuženom Seadu Zahiroviću izrekne mjera sigurnosti zabrane vršenja dužnosti odgovorne osobe u udruženjima i fondacijama i osobe ovlaštene za raspolaganje novčanim sredstvima udruženja i fondacija u trajanju od najmanje 5 godina računajući od dana pravosnažnosti presude.

Osim navedenog, optužnicom je zatraženo da se od optuženog Zahirovića oduzme **imovinska korist** pribavljena krivičnim djelom u iznosu od **50.313,82 KM**, te oduzimanje imovinske koristi od pravnih i fizičkih osoba kojima je počinjenjem krivičnog djela pribavio imovinsku korist i to: od preduzeća „Net Pro“ d.o.o. Brčko iznos od 35.850,00 KM, od udruženja građana „Brčanski demokratski forum“ iznos od 900,00 KM, od E.R. iznos od 3.850,00 KM, od D.V. iznos od 4.500,00 KM, od A.G. iznos od 22.300,00 KM, od A.S. iznos od 2.000,00 KM i od E.L. iznos od 1.500,00 KM.

Optužnicom od šesnaest tačaka, od kojih se svaka odnosi na posebnu malverzaciju s dodijeljenim sredstvima, Sead Zahirović se tereti da je u vremenskom periodu od 2015. do 2020. godine, na području Brčko distrikta BiH, postupajući u svojstvu odgovorne osobe i osobe ovlaštene za zastupanje i raspolaganje novčanim sredstvima u udruženju građana „Brčanski demokratski forum“ Brčko i udruženju građana „Fondacija Zenan“ Brčko, iako

svjestan da je kao odgovorna osoba u tim udruženjima i osoba ovlaštena za raspolaganje novčanim sredstvima tih udruženja, zadužen za osiguranje zakonitosti njihovog rada i znajući da je u skladu sa statutima navedenih udruženja građana dužan da upravlja imovinom udruženja s dužnom pažnjom na odgovoran i zakonit način u najboljem interesu udruženja, isti je i pored svega navedenog u namjeri da sebi i drugim fizičkim i pravnim osobama pribavi imovinsku korist, nezakonito raspolagao dijelom novčanih sredstava tih udruženja, iako znajući da su ta sredstva isplaćena na ime grantova iz budžeta i da su namijenjena za redovan rad udruženja, svjestan da takvim nezakonitim raspolaganjem dijelom novčanih sredstava dodijeljenih i isplaćenih od strane Vlade Brčko distrikta BiH i to za udruženje građana „Brčanski demokratski forum“ u iznosu od ukupno 136.200,00 KM, a za udruženje građana „Fondacija Zenan“ u iznosu od 71.000,00 KM, za svoju korist i korist drugih fizičkih i pravnih osoba, a ne za rad udruženja, pribavlja sebi i drugima imovinsku korist na štetu Brčko distrikta BiH, a zatim je ta nezakonito pribavljena novčana sredstva stavljao u redovne finansijske tokove u namjeri da na takav način prikrije činjenicu da su ta sredstva pribavljena zloupotrebom njegovog uticajnog položaja, odnosno njihovu stvarnu prirodu.

S obzirom na to da iznos imovinske koristi pribavljene krivičnim djelom korupcije prelazi 50 hiljada KM, Tužilaštvo Brčko distrikta BiH je optužilo Zahirovića za najteži oblik zloupotrebe položaja ili ovlaštenja, s propisanom kaznom zatvora od najmanje tri godine. Imajući u vidu i da je velika vrijednost pribavljene koristi stavljena u redovne finansijske tokove, on je optužen i za teži oblik krivičnog djela pranja novca, za koje je zapriječena kazna zatvora u trajanju od jedne do deset godina.

Tužilaštvo Brčko distrikta BiH među prvim je institucijama u Bosni i Hercegovini koje su se blagovremeno, po službenoj dužnosti, uhvatile u koštac s anomalijama u trošenju budžetskih sredstava građana. Procesuiran je veliki broj osoba, a i dalje se provode intenzivne istražne radnje s ciljem prikupljanja dokaza o krivičnopravnim radnjama u vezi s nezakonitim trošenjem grantova.

\*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.

**ZAMJENIK GLAVNOG TUŽIOCA**

---

**Vladimir Tepavčević**